

豫章叢書

第九冊

張

華

張

書

四七

懷葛堂集卷七

南豐梁 份質人甫著

墓表 誌銘

懷遠郭將軍墓表

懷遠郭將軍者閩之福清世家子以武舉選授西安衛累官都閫葬西安郭杜間則厥嗣恆所始著籍也士以制科選始於隋科以文武分始於唐天長起家以武舉異等始於汾陽郭子儀是則武科之盛自古昔來莫郭氏若矣而汾陽之先人後裔皆不以武稱則又何也將樽俎干戈世異而階殊家傳而各用耶

福清之郭與汾陽華胄屬不屬未之考而將門不將
何古今後先之合符節也走交將軍之次仲子恆也
久矣知將軍於觀察李我郊之墓文也深矣將軍諱
登龍字際飛別號御六性孝友溫恭凝重祖父以諸
生孝廉世其家將軍固孝子順孫尤篤志天人性命
學詩文其緒餘也弱冠會草創開科偶以弓馬策論
試中式非所志也宴鷹揚典試則周櫟園亮工分校
則李山顏明整皆當代名宿交相慶將軍賦詩充羔
鴈二公期以天下士然惟用武有地則交相惜焉比
壯授西安衛關中古帝都被山帶河心甚樂之而日

督屯課耕耘已耳未幾轉江陰而歲輓輸漕粟已耳
未幾陞龍里衛而理錢穀訟獄賑飢禱雨拔士修學
宮化椎結侏離之鬼國已耳將軍十九年中厯三衛
兵官也所治無一兵非字民之職也所有之地軍也
皆民也用武之無地也將軍循吏矣名實素而服官
政之年遂初已賦矣隱六朝風雅地載酒榼詩筒陶
情於湖山花月下與名流杜于皇潛輩角勝爭雄長
人不知爲故將軍而將軍則自適其適也其篤於愛
猶子推解故人輯先賢祠置義塚好行其德雖萬戶
侯何以過焉捐館時子四孫六雖遜汾陽然已分其

半矣恆爲走言先君晚擅風雅然匡坐不偏跼造次
嘖咲不苟人皆肅然時恆幼小多不能記憶惟易簣
命恆輩曰生能指柱天地方可謂人云鄂社間山旣
買亦朱邑之桐鄉矣走過而指之曰此牛眠地也恆
然之甲午乃葬於今七年矣恆以走不諛墓而以表
碣屬不獲辭將軍子恆字善夫方需次州牧善夫之
子景文純已任興平教諭今陞知縣候補則將軍誥
封從文階等而上之方未艾而表稱將軍從武是遵
何說歟走讀葉文忠之蒼霞集矣其誌同里郭雲橋
墓曰吾鄉稱古文詞始自郭氏及誌雲橋子肖雲都

閩則曰父子兄弟皆以文學著聲公獨用武公子孝廉續祖之緒而光大之又讀林柱史之文曰擬之東京之班氏且定遠之後不能及然則將門不將福清之郭於肖雲已然矣肖雲蓋將軍之叔祖也走師葉林二公之意而稱而表之其誰曰非歟

黃君麟裁暨配溫孺人合葬墓表

石城黃氏二孝廉曰道瀾道漪一父之子也康熙癸巳開特科慎選主司同考並公明以非常典也黃氏兄弟並登雋宴鹿鳴歸咸羨雙珠聯璧顧出詘科名石城地殊異數也兄弟益謹勅守賢父母教績學並

大著名於世及二親終求可以傳其親者不謀諸顯
貴而徵表墓石於布衣則亦奇矣份固辭弗獲謹按
狀明經義侯爲君父陳太孺人爲君母兄弟六人君
其行五也君諱鉞字麟裁私謚文莊生明崇禎戊寅
卒癸巳六月得年七十有六元配溫孺人先君一飯
生稱未亡人者十年諸詳劉子青麓誌中及黃永年
合葬墓志銘中先是君葬南山之原青烏家卜佳城
今某處請改葬於是舉孺人櫬合葬禮曰魯人之祔
也合之詩所詠同穴其是之謂耶子三長道泓早卒
次幼則道灞道漪二孝廉也女二孫八曾孫五曾孫

女一君為人率而純處兄弟和而直接人以信好義
任艱危事不惜施予性警敏卞急雅不容人過教子
嚴而以身作則幼力學攻舉子業視科名如探於懷
而捉諸掌也戊子石城陷俘掠入閩以智計脫甲寅
又陷免盡室於刀鋸解同繫之全家人皆縮息保首
領之不暇君任機權脫之於當阨其才能應變有裕
刻若此怨家且忌而誣之君不置辯而事立白人益
重焉丙寅析子姓褻薄遊江南北京畿地名勝留題
然恥書壁其奚囊則撲滿矣先世雄於貲君雅長幹
濟尤厚於宗族祀事不豐者死不能葬者男不能婚

者衣食不能繼者病者老者孤者皆曲體一周之
必使可受且口不言而色無德也甲申石城饑多閉
糶君約好義分城門賑村落相倣倣邑皆果腹向之
謗其薰者於焉頌其賢君則德怨皆無之初試童子
亞冠軍補弟子員輒高等賓興則蹶笑曰千佛名經
我獨無二子必有之益督二子學癸未君青年有六
郡邑庠以君達尊二請邑侯舉大賓或曰君爵天爵
也又十年癸巳特開科二子道瀚道漪皆有名識者
莫不爲君慶且爲石城黃氏慶爲特科得人慶以家
學世德皆食報於二子人所無而君皆有也比二子

歸拜家慶君軒渠一笑默不一言非不言也豈不以
是爲君家固有耶學之切於身者莫大乎事親從兄
處已接人焉耳已君生平務其實而教子以身夫何
不可致之有拜慶子且二非不言也此君家所固有
也孺人以具慶趣君言始大言曰託公伍先生家南
昌若輩訪之否二子齊聲對已訪今何如對曰傳子
孫止三喪未厝也君蹙然曰昔石曼卿三喪未舉范
堯夫以麥五百斛及舟助我失教爾何知夫曼卿父
執也伍先生我師也助麥舟可少緩耶亟往助不得
偕計吏行也二子行不越月而君長逝矣君生平備

百行而篤在三於易簣可不謂之全人也耶辭曰
名成在學得失在天父失子得父子何分失一得二
天厚高賢旣葬改葬壙納名文隧表不朽以風後人
節母汪太君墓表

節母姓汪氏歛縣潛溪人汪公其梁之季女也年十
六爲邑子方君微之妻生子男二子女一年三十而
寡又十七年以疾終詩言女子無非無儀而易曰地
道無成而代終節母爲女孝爲婦爲母爲祖母順且
慈三十餘年人無間言嗚呼可傳也已節母天資貞
慧篤大義初微之君賈遷家政身爲筦之姑老養之

幼子瘍冢嗣穆符弱成之及身爲未亡人也且爲辨
祖龍之吉凶且爲守先人之廬舍其爭也懷伏突其
讓也推新宅若古大臣之托孤寄命者長子長且爲
卜而婚焉弱女長且爲笄而嫁焉孫男士瑄士瑚士
璣生父母儼然在也歲儉則恆饑以飽之患痘則求
死以生之興居出入則提攜保護之知有夫有子若
孫而已不知身之憂傷劬勞艱難百折老而且死也
是皆人道之常而女婦所難能者節母之孫三而士
瑄長節母愛之也甚於人之母而士瑄之孝思也過
於人之子士瑄每言祖母軼事輒淚淫淫下而不自

知也李密之陳情也曰臣無祖母無以有今日竊以
其言爲過夫親親之愛代隔則疎祖母固一傳而再
也木之蔭也止於實火之炎也盡於薪故禮五世則
親盡而上下旁俱有殺也陰陽合而成形老陽老陰
半也再傳半之牛三什一有奇四且什不一矣故五
世親盡主祧不爲服且夫陰雜進而益微不若陽之
老窮少傳雖百世之遠猶陽之一綫也故有百世不
祧者祖也非所論於妣也稱祖及之者配祖也然則
孫之孝其祖固人所難而祖母則尤難者今於節母
見之可不謂賢哉節母以清順治丙申年六月六日

卒越三十有二年士琯等始克以康熙戊辰十一月十五日葬於大塢尖之唐由清江熊頤爲誌銘新城黃光會有記份於二子學同師士琯交份且久請表其墓上之石故述其大畧使世知孝慈之可風而不能者可以媿也

方母徐孺人墓表

孺人徐氏歎之傳溪人父曰英尙母方氏孺人明大義惇行孝讓年十有七嫁方君西城卓然有桓少君孟德曜風當家道中落夫子游四方尊章之甘毳薪米之凌雜朝夕之尸養皆孺人身任之機杼縫紉燈

火率常達夜分艱辛况瘁而奉養不少缺乏若非處
隱約窮匱者又未常色艱難負勞苦而自矜伐徹夫
子之聽此其爲賢也先是父母聞孺人操作苦常有
所贈饋孺人並出齋裝以周用翁墓田之訟有費二
叔之藥餌有費小姑之槃匱有費兵亂之伏匿有費
畢給於孺人孺人儉於資已厚於所親好行其德而
善用其財無愆惜於心忘其身之苦力之竭也人皆
以爲難而孺人恬然也其視遇內外屬自爲女及嫁
皆有恩而衷之以禮里婦偶欺突不動聲色其人反
愧不自安其於喪祭大事鰥鰥焉不欲以須臾緩祖

姑汪太君未葬賓客形家往來無虛日泊酒脯作食
蕭然無聲廝與人咸醉飽其夫子常以往昔困頓爲
言孺人曰貧人所恆有苟自給願無忘往事耳體特
羸多姪戊辰二月朔產女旣食頃暴卒時年四十有
二卒之九越月十有四日祔祖姑葬大塢尖之唐由
昔孺人所經營者其祔也固宜子男二曰良孺曰良
壽子女二一適槐塘程氏子其一尙幼孺人死之日
內外族黨咸雪涕其二叔哭尤哀若子於其親者蓋
孺人無間於爲母感至深也其夫子字西城節母汪
太君之冢孫士琯也份旣表節母因並書孺人之墓